



Tir Yimiyim

www.tiryimiyim.in

Regd. No. RNI. NAGAAO/2004/13113. Postal-NE/RN-717.

e-mail : tiryimiyim@gmail.com

TAPAK 8

Yangia anidakangma :

Tir Yimiyim

tiryimiyim@aolima

tir yimiyim

TAPAK 3

PM Khan atema Pakistan Senate nung confidence vote agiteptsü

Meghalaya: Congress MLA Azad Zaman süogo

VOL. XVIII NO. 140 (ADOK 140) DIMAPUR ROGONÜ (FRIDAY) METSÜREMI (MARCH) 05, 2021 ₹ 5.00

COVID-19 Nagaland: Nisung 5 dak tashidak potetogo

Kohima, Metsüremi/ March 4 (TYO): Nagaland nung tanü nisung pongu dak COVID-19 tashidak poteta tashidak menar 12,210 jungogo.

"Tanü nisung 5 dak COVID-19 tashidak potetogo aser Kohima nung shiranga alir ana anepogo," ta Health and Family Welfare Department Director, Dr Denis Hangsing-i metetdaksü.

Tang tashi nung tashidak menar alir 12,210 rongnungi nisung 11,951 anepogo koba shilem 97.87 asütsü ta pai ashi.

Tang tashidak agi tonger nisung 15 tema anepaludar, koba total case nung shilem 0.12 dang lir. Kasa mapang nung iba tashidak agi nisung 91 süogo aser nisung 153 tanga state-i ogo, ta paisa ashi.

Nagaland nung tang tashi nung COVID-19 tashidak keta alitsü ta temulung melemi bilemba samples 1,31,243 tendangogo, kong RT-PCR nung tendangba 74,867, TrueNat ajanga 37,363 aser Rapid Antigen Test ajanga tendangba 19,013 densema lir, ta Dr Hangsing-i ashi.

CNCCI Air Cargo Services amenokba atema pelaba lemsatep

Dimapur, Metsüremi/March 4 (TYO): Department of Horticulture, Airport Authority of India nati achaayanga Air India aser Indigo den longjemer Dimapur Airport nung tawa Air Cargo Services amenokba ya tenung asangtsü langa lir, aser state rongsenketsüng alima den takaratiba nung liromedema aotsü asoshi kanga tapet lir, ta CNCCI-i sangdong ka ajanga ashi.

Confederation of Nagaland Chamber of Commerce and Industry (CNCCI)-i Nagaland nung shishilembaba lokti tentet balala aser entrepreneurs tem tenung nung sorkar aser Department of Horticulture dang iba jenjang agiba atema kanga pelaba lemsateper.

Iba amala jenjang agiba ya ajaki nongita yaritsü nungdaker aser CNCCI-i, AAI, Air India aser Indigo Airlines dang iba service agütsüba maongka takokba tashi agitsü atema

shishilembaba lokti aser entrepreneurs tem ajungmesotsü asoshi tetsükdaksü makaba service ka agütsütsü mepeshir.

CNCCI-isa, shishilembaba lokti aser entrepreneurs tem dang iba service takok tashi amshitsü ayongzüker. Temetettsükaji shishilembaba lokti aser entrepreneurs temi infrastructure, tesendaktep aser marketing avenues aginüa aruogo aser sorkar dang state adena oa shishilembatsü atema mapang talangka mepeshia aruogo.

Anungji CNCCI-i iba jenjang agiba ya alizüing tasen ka tongtetba ama agizüker aser state nung shishilembartem aser entrepreneurs tem atema sempet tajungtiba ka ta züingshir, ta CNCCI General Secretary Dr. Seyievilie Mora ser mendenbuba Dr. Khekugha Muru nati sangdong ka ajanga lemsatep.

NSCN-i ken o jangjashitsür

Dimapur, Metsürmei/March 4 (TYO): NSCN-i NSCN (KK) züngsem ka khaset ta social media aser osangkaket balala nung prokshia arudar. Osang ajanga, Deobarnü Arunachal Pradesh, Longding district kübok Chatung yimtsüng anasa arem nung Deobarnü rara tulu adok ta sangdonga liasü. Maneni osang ajangasa NSCN züngsem asütsü ta temulung melemi bilemba nisungtemi NSCN (KK) züngsem Jomie Konyak tepset ta sangdongogo.

Iba osang dak sendakba nung Longding district nung raratepba nung NSCN densema mali ta jangjashitsüner. Jomie Konyak tepsetba dak onok kecha sendaka mali, MIP, NSCN/GPRN sangdong ka ajanga metetdaksü

Naga nunger matsüngdang NSCN tenüing menüksütsü asoshi tashi kar ajanga tai ajak onok dak tongloksür ta temulung melemi bilemer, koba Assam Rifles (AR)-i NSCN anema inyakba mapang aiben inyaka arudar, ta kasa sangdong ajanga metetdaksü.



Kohima nung March 4, 2021 nü World Engineering Day amungba mapang Minister Tongpang Ozukum, MLA T Yangseo Sangtam aser FONSESA ketdangsürtemi Vision Document 2021 sayaba amer tangokba noksa ka yangi angur.

Eastern Nagaland nung lenmang tali yanglutsü teimla sayur

Dimapur, Metsüremi/ March 4 (TYO): Eastern Nagaland kübok North-South corridor nung Mon aser Avangkhu tsüngta aser East-West corridor nung Tuensang, Noklak, Kiphire aser Zunheboto nungi Dimapur tashi sendaktepba lenmang

kilometres 500 shi yanglutsü asoshi Union Minister for Road Transport and Highways, Nitin Gadkari-i 'in-principle' nung agizükogo, ta Nagaland Governor-i tanü ashi. Nagaland anüdoklen aser district tezülen lenmang tsütsü tesendaktep tawa tulu aliba

awajemdaksütsü asoshi ken o benoka jembia liasü, ta Governor RN Ravi-i sangdong ka nung ashi.

Nüburtem timtem angatetba Nitin Gadkari, Honble Minister for Road Transport and Highways dang kanga pelar, ta paisa ashi.

Nagaland nung COVID mozü doses 41,099 agütsüogo

Kohima, Metsüremi/March 04 (TYO): Nagaland nung tanü tashinung COVID-19 mozü doses 41,099 agütsüogo, ta Brehostibarnü sangdong ka ajanga ashi.

Nisung 35,181 nem COVID-19 mozü doses 41,099 agütsüogo, aser item rongnung teintet rogo 759 aser arishi küm

45 dak tema danga tashidak agi menepa alir nisung 76 dena lir, ta State Immunization Officer Dr. Ritu Thurr-i ashi.

State nung tang tashinung doses agüja aliba rongnung frontline worker 23,891 aser healthcare wadang nung inyaker 10,455 lir, ta Dr. Thurr-isa ashi.

Healthcare nung inyakertem rongnung nisung 5,918 bo COVID-19 mozü tanabuba agia iba vaccination course temogo, ta pai ashi.

Iba mozü agir alirtem rongnung tanü tashi nisung kata temang nung timtem mokoktetsüsa ajangshia mali, ta Dr. Thurr-i ashi.

Ease of Living Index nung Kohima jenjang tajungba kumogo

Dimapur, Metsüremi/March 04 (TYO): Ease of Living Index (EoLI) nung Nagaland state yimtiba, Kohima ya nisung alitsü tasaktiba yimti rongnung jenjang tanabuba nung liasü saka tangbo yimti 111 rongnung jenjang 92 buba nung lir.

Nütsüing yongsük million ka dang tajemba aliba yimti 62 nungi Kohima ya jenjang 49 nung lir aser North East nung aliba yimti 10 nungi jenjang 4 buba nung lir.

Ministry of Housing and Urban Affairs (MoHUA) ajanga EoLI aser Municipal Performances Index 2020 result ya tanü virtual ajanga sangdonga liasü.

National average score 53.51 lir aser Kohima-i overall score ya 49.87 nguteta liasü.

EoLI ajanga yimti 111 nung India nunger sadok-sayima,

pelashishia aliba asadanger aser iba nung parnoki quality of life, economic ability, sustainability aser citizen perception survey nung temolung agüja asadanger.

Iba osang sangdongba sülen osangbener den jembiba mapang, "Tesüiba mapang dang tera agi tajungba aser meilongi süaka terenlok sayur," ta Chief Executive Officer, Kohima Smart City Development Limited (KSCDL), Kovi Meyase-i ashi.

Kohima nung aliba nüburtemi 'citizen perception survey' nung tasü ita shilem agiba asoshi pelaba lemsatepba mapang, yimti nung mürekmejuba tsütsü nübur tangatetba melenshiogo, ta Meyase-i ashi.

Sector kar nungbo tzü, lenmang, power system aser

hospitality tsütsü municipality ajanga ashitsü kecha madoker, ta Kohima Municipal Council indang administrator, Meyase-isa ashi.

"Danga municipality nung ama masü item ya asenoki maziükteter, kechiaser urban local bodies nungbo item inyakyim ajunga atema tashi agüja lir. Saka ketdangsürtem dangatetba kati arua item sector nung terenlok angutsü imlar," ta pai ashi.

Municipal Performance Index (MPI) kübok linük nung nütsüing yongsük million ka dang tajemba aliba urban local bodies 60 nungi Kohima ya jenjang 58 buba nung lir.

Kohima ya services nung jenjang 58, finances nung 54, technology nung 36, planning nung 60 aser governance nung 46 buba jenjang nung lir.

Department of Health & Family Welfare nem CCE agütsü



Dimapur, Metsüremi/March 4 (TYO): ONGC Foundation-i, Department of Health and Family Welfare, Nagaland nem March 4 Principal Directors Chamber nung 12:30 ako nung Cold Chain Equipments (CCE) tem tenla agüja liasü.

DGM (Geology) Temjenyanger nem hadirtem achaayangtsü atema nongloksüba den hadir ajak nung ONGC stickers maloktsüsü bendanga agütsü. Paisa, ONGC tenung nung o

tatsüka jembi aser senden nung densema aliba ketdangsertem agizük. India sorkar tetuyuba dak ajemdaker ONGC dang Medical Department nem teyari agütsüsü tuyu aser parnoki Ice Lined Refrigerator (ILR) aser Cold Chain amala Medical equipments tem alitsü atema senotsü teyari agüja liasü. Senden tembangba sülen züngsemtemi Medical equipments tem asadanga liasü. Executive Director-Basin Manager, Assam and Assam Arakan Basin, Jorhat, Puneet

Suri-i achaayanga Cold Chain Equipments tem state kübok Cold Chain Points balala nung amenokogo.

Senden nung Dr Kevichusa Medikhru, Principal Director, DoHFW, Temjenyanger DGM (Geology), Dr Ritu Thurr, State Immunization Officer (UIP), Dr G.R Rio, Deputy Director (UIP), Dr Kikameren Longkumer, Joint Director DoHFW, Keneingulie Solo, State Cold Chain Officer (UIP) nunger dena liasü.

RD Director Imnukshila den tepila sentong agi



Dimapur, Metsüremi/March 4 (TYO): Rural Development Director, Imnukshila Jamir den March 4 nü RD Directorate Conference Hall nung tepila sentong agiogo.

Imnukshila Jamir ya State Rural Development Agency (SRDA) nung 1986 küm March 1 nü Assistant Project Officer ama aniok. SRDA nung inyakterem Rural Development department den lokteptsüba mapang la Asst. director liasü. Lai RD department nung mezüngbuba tetsür director ama 2019 küm October 1 nü mapa belenzük aser 2021 küm February 28 nü mapa nungi anen.

Mapa takok ngua tembangba atema tenüngsang agüba mapang RD Minister, Metsüba Jamir-i, la kanga dang tesüngjem, tayimjem aser tetangshi lenir ka liasü ta shia la nem tenüngsang agütsüba den

Covid wara mapang lai department kanga takok ngua tejakdangi aniba atema tenüngsang agütsü.

Paisa, la ya district ajak amai nung inyakba nisung ka aser kong südir süaka la mapa ajak kanga süngjema takok ngua inyakogo, ta ashi.

Salem osang lemsateptsü atema department-i meyipa aruba tepela lemsatepba den RD minister-isa, tarutsü nung director temi la tsüngsü nung anidaktsü aser lai meranga inyakba reprangzüka inyaktüsü imlaba lemsatep.

Commissioner & Secretary, RD, Neposo Theluo-ia, la ya kanga tongmelang, ajemalu aser tesatok liasü ta shia, küm 35 sorkar mapa nung tenzüker takok nung tembangba atema la nem tenüngsang agütsü. Paisa, Imnukshila-i tetsükdaktsü aser tebilemstü aika liaka la mapa aser khuret angateta kanga

takok ngua inyakogo, ta ashi.

Kasa mapang nung mapa toktsür aoba ketdangseri la kübok inyakterem ajaki la den teka amteper inyakba atema kanga pelaba lemsatep, koba ajanga la mapa nung teyari agütsü aser nükjidingo aika ajantetogo. Laisa, maneni la melenertem den teka amteper inyaktüsü imlaba lemsatepba den department atema maneni sarasademtsüsü aser nongita yaritsü ta ashi.

Iba sentong ya Director, RD, Liboni Humtsoe lenisüba kübok agi aser joint director, G. Thong-i tepela o jembia liasü. Maneni NRDSA tir K. Neibou Sekhose, NSRLM Mission Director Imtimenla, ministerial staff tenung nung registrar Kikrvculhounuo Solo, aser DRDAs o Blocks tenung nung PD, DRDA Mokokchung M. Toshimongla nungeria o jembia liasü.

Nagaland nung International Women's Day 2021 amungtsü

Dimapur, Metsüremi/March 04 (TYO): Department of Social Welfare kübok Nagaland State Commission for Women, Nagaland State Social Welfare Board aser State Resource

Centre for Women lungjemer March 8, 2021 nü The Deck, Hotel Vivor, Kohima nung International Women's Day 2021 amungtsü. Iba anogomung ya "Women in leadership: Achieving

an equal future in a Covid-19 World" omen nung ajemdaker amungtsü, kong Chief Secretary, Nagaland, J. Alam IAS ya tetushi tesemdanger ka ama arua sentong moatsütsü.

Tanü nungi e-EPIC download sütettsü

Dimapur, Metsüremi/March

04 (TYO): Special Summary Revision, 2021 mapang tenung zülüokba electors tasentem atema Election Commission of India ajanga maongka agüja lir aser NVSP/VHA ajanga e-EPIC download sütettsü, ta Deputy Commissioner aser District Election Officer Kohima, Gregory Thejawelie NCS ajanga sangdong ka nung metetdaktsü.

November-December, 2020 mapang electoral roll nung tenung zülüokba elector ajungai e-EPIC ya nvsp.in ajanga download asütsü

metetdaktsüogo.

Maneni Electoral Registration Officer, Kohima, ADC Tseminyu, ADC Chiephobozou, SDO(C) Sechu/Zubza, SDO(C) Jakhama, EAC Kezocha, EAC Botsa aser EAC Tsogin office tem nunga March 5-6 aser March 12-13, 2021 anogotem office mapang tang tasen zülüoka aliba elector tem yaritsü asoshi camp tem ayongzüka office mapang e-EPIC download sütsüsü. Anungji item camp ajanga pei indang e-EPIC download asütsü metetdaktsür, ta sangdong ajangasa ashi.

Dimapur nung ango metsü alem



Dimapur, Metsüremi/March

04 (TYO): Department of Fisheries & Aquatic Resources aser ICAR- Central Institute of Fresh Water Aquaculture (ICAR-CIFA), Bhubaneswar, Odisha lungjemer project "Mission Stunted Fingerlings and Species Diversification for Development of Fisheries" kübok Dimapur district nung aliba Ura aser Diezephe yimtsüngtem nung aluyimer nem March 02, 2021 nü Amur Carp aser Singhi ango metsü lema agüja liasü.

Government Brooders Fish Farm, Dimapur nung item ango lema agütsüba sentong ya agi, kong Sub Divisional Fishery Officer, Khriezhato Nakhro-i iba

project indang rateta ashi aser tarutsü nung inyaktüsü mapatem indanga jembia liasü.

Assistant Director aser iba project nung Nodal Officer ajanga scientific yimya amshia ango metsüba nung tajangzüka aliba indang nüburtem nem angatetdaktsü aser ango metsürtem dang technology tasen angateta amshitsü ayongzüka liasü.

Maneni iba project atema nungdakbatem peria agütsüba asoshi paisa Director, ICAR-CIFA, Dr. S.K. Swain aser Principal Scientist & Nodal Officer for NEH, ICAR-CIFA, Bhubaneswar, Odisha, Dr. P. P. Chakrabarti na dang pelaba lemsatepa liasü.

Tetsür PE tesayur nem online training agütsüsü

Dimapur, Metsüremi/March 04 (TYO):

International Women's Day nungtem nung Ministry of Youth Affairs and Sports ajanga tetsür PE teacher aser physical education wadang nung community/sports coaches tem ajungkettsü atema Fit India Movement kübok online programme ka agitsü telemtetba agiogo, ta NBSE sandong ka ajanga ashi.

Tang PE tesayur aser community/sports coaches teinyakdak aser inyaktüsü jangraba tetsürtem nem online training ya March 2021 nung agütsüsü sentong lir, aser ibaji International Women's Day (March 8) nung tenzüksü.

Iba sentong ya hopta ana atema alitsü, kong ajak senteper session 28 (minute 90

indang session ana) alitsü. Iba sentong ya ajanga physical education tsütsü alima nung training agütsür tajungtiba tem nungi tetsür tesayur nem training agütsüsü maongka angutsü.

Iba online training sentong ya tesayur tetsürtem nem yamai lemsar agütsüsü:

1. Primary classes : Primary teachers shirnoki pei school nung physical activities inyaker.
2. Secondary/higher secondary classes : a) PE Teachers. b) Community/Sports coaches.
3. Tesayur/coaches mapa inyaktüsü jangrarterem.

Tejanrarteremi training sentong indang link <https://schoolfitness.khelindia.gov.in/tot.aspx> nung tenung zülüoktsü akok



Shillong, March 4: Meghalaya chief minister Conrad K Sangma-i, North Garo Hills district, Bajengdoba kübok Bakennang Nalsa nung Mini Stadium ka yanglutsü atema Brehostibarnü nungshilong azüngtsüogo. State Plan Scheme ajanga sentotsü teyari agüja iba stadium ya sen 3,01,85,000 intoka yanglutsü.

Assam Congress-i mapa mongui aliba lanurtem atema website ka amenoktsü

Guwahati, Metsüremi/March 4 (Agencies): Assam Congress-i state nung mapa mongui aliba lanurtem atema website ka amenokgo.

Website; congressor5guarantee.in ya Assam Congress-i Brehostibarnü Guwahatia nung amenokgo.

Iba website ya Assam Congress-i state nung mapa mongui aliba lanurtem atema amenoktsü, aser Congress-i sorkar kümtetba sülen parnok nem sector balala nung mapa agütsütsü.

Website amenokba sülen mapa asoshi tenüng züngoksemba inyakyim yakta tenzüksü.

Mapa mongui alirtem tenüng züngoksemsü atema mezüng www.congressor5guarantee.in semdangtsüla aser iba sülen osang tejangja agüja form fill up ser submit button nung anemtsüla. Maneni iba sülen registration ID SMS ajanga

yoktsü. ID kümsüka ayutsüla. Assam Congress-i, "sorkar kümtetba sülen onoki mapa agütsütsü nangzükba ataloktsütsü asoshi tongtibangsa inyaksü," ta ashi.

Iba website ya aikati kanga junga agizükogo aser website amenoba sülen ghonda ka tsüngda lanur 800 shi mapa atema züngoksemogo.

Assam Congress-isa, Assam nung mapa mongui aliba lanurtem atema mapa agütsütsü asoshi department balaka amenoktsü, ta tenangzükba agütsü.

"Iba department tasenba dang ya Ministry of Jobs ta ajatsü," ta Lok Sabha MP Gaurav Gogoi-i ashi.

"Iba ministry tasenba ya accountable asütsü kechiyong iba atema minister balaka alitsü," ta Pradyut Bordoloi-i ashi.

Kasa mapang nung Congress lenir tejen Sushmita Dev-i, Congress-i sorkar

kümtetba sülen state nung tetsürtem atema mapa shilem 50 mekazüka toktsütsü, ta ashi.

"Assam nung vote agütsür shilem 49 bo tetsürtem lir. State terenlok nung shilem agütsü atema tetsürtem nem kasa maongka agütsütsüla," ta Sushmita Dev-i ashi.

Maneni Assam Congress-i, state nung 2016 Assembly election matong tsüngda BJP-i lanurtem nem mapa lakh 25 agütsütsü nangzükba aitsüogo.

"Onoki makoktsü ser nung tenangzükba agütsüba dak tamang maker. 2016 küm BJP-i mapa lakh 25 agütsütsü nangzükba liasü. Parnoki tamakok nguogo," ta Assam Congress tekolakba Ripun Bora-i ashi.

"Assam Congress nem vota agüja sorkar kümtetra onoki Assam nung aliba lanurtem nem mapa lakh 5 agütsütsü nangzükba," ta Ripun Bora-i shisem.

Arunachal: Indo-Tibet arrtsü nung model villages 3 amenoktsü

Itanagar, Metsüremi/March 4 (Agencies): Arunachal Pradesh sorkari Indo-Tibet arrtsü nung model village asem amenoktsü telemetba agiogo.

Sorkari arrtsü nung terenlok ajungkettsü atema sen crore 30 alang pilot project ka tenzükgogo.

Osang ajanga ashiba agi, sen crore 30 intoka arrtsü nung model village asem amenoktsü telemetba agiba ya 2021-22 state budget nung project balala atema sen crore 131 inoka aliba nung shilem ka lir.

Ketdangsertemi ashiba agi, pilot project kübok Arunachal Pradesh anüdoklen, anüolen

aser teyongtsü len arrtsü nung yimtsüng kaka model village ama amenoktsü, kong lenmang tajung densema basic facilities aser infrastructure ajak agütsütsü.

Mein-i tang agia aliba budget session nung, arrtsü nung aliba yimtsüngtem terenlok asoshi inyaksü ya state sorkar atema tongtibangtiba maparen ka lir, ta ashi.

"Ato Kilonser Narendra Modi lenisüba kübok taoba kümtem tsüngda arrtsü nung lenlang densema terenlok asoshi inyakba asenoki

ajangshio. Yimtsüngtem maneni terenlok asoshi inyaksü aser lenmang, power, tzü, health aser education tajung agütsütsü," ta pai ashi.

Taruba fiscal atema budget nung sorkari lisopurtem libaliro wazüka ayutsü atema sen crore 38, indigenous heritage centre tem wazüka ayutsü atema sen crore pezü aser tribal cultural centre tem yanglutsü atema sen crore 40 intoktsü sorkari benokdangogo.

Centre sorkari arrtsü nung highway terenlok asoshi detailed project report (DPR) agizükogo.

Guwahati, March 4: Assam Assembly election matong tsüngda Congress MP Gaurav Gogoi-i Rajiv Bhawan nung party election campaign website amenoktsüba noksa nung angur.



CPI (M) & Khristantemi Easter anogo ADC election agütsü lemtetba ashishi

Agartala, Metsüremi/March 4 (Agencies): Tripura Tribal Areas Autonomous District Council (TTAADC) election agütsüba anogo sangdongba sülen ghonda ishika tsüngda CPI (M) aser Khristan temi April 4 nü election agütsü atema telemetba agiba ashishia liasü.

Tripura State Election Commission-i, Tripura Tribal Areas Autonomous District Council (TTAADC) election April 4, 2021 nü agütsü ta Bodhbarnü metetdakja liasü.

Ajüsüka April 4 nü election agütsü lemtetba atema CPI (M) aser Khristantemi ashishio, kechiyong April 4 ya Easter Sunday lir, koba Khristan tem atema kanga tongtibang anogo ka lir.

CPI (M) lenir aser taoba MP Jitendra Choudhury-i, State Election Commission-i vote agütsüba anogo April 4 asütsü shimba atema kanga mejungi aitsüogo.

Choudhury-i, Tripura Tribal Areas Autonomous District Council election agütsüba anogo tanaben asadangshitsü khangogo.

Choudhury-i Facebook nung: "India ya secular linük ka lir; onoki tamangba yimsü ajak nem kasa akhümtsübu agütsür. April 4 ya Easter Sunday lir, koba

Khristan tem atema kanga tongtibang anogo ka lir. State Election Commission-i election agütsü atema iba anogo meshimtsü asü," ta zülutsü.

CPI (M) lenir-i ashiba agi, Tripura nung Khristantem aika lir aser iba ya temulungdang yur State Election Commission-i April 4 nü ADC election agütsü atema meshimtsü asü, kechiyong Khristantemi vote agütsü marutsü.

Kasa mapang nung Tripura nung Khristantemia, State Election Commission-i Easter Sunday nü ADC election agütsü lemtetba atema mepelaba lematepogo.

Diocese of Agartala otongdar-i sangdong ka ajanga ashiba agi, "Khristan lokti tentet balala nungi lenirtem Bodhbarnü ajurutepogo aser March 2 nü TTAADC general elections agütsüba anogo sangdongba dak sendakba nung tezü atangba aser akosaba lemsatepogo."

Iba dak sendakba nung Agartala Diocese Bishop, Fr Lumen Monterio-i, State Election Commissioner dangi shiti ka zülüogo.

State Election Commission-i ashiba agi, vote tem April 8 nü azüngtsü.

Meghalaya: Congress MLA Azad Zaman süogo

Shillong, Metsüremi/March 4 (Agencies): Meghalaya kübok Rajabala constituency nungi Congress MLA Azad Zaman Brehostibar anepdang züngia lia süogo.

Congress MLA Azad Zaman ya arishi küm 47 liasü.

Azad Zaman ya temulungjang mapa minyak küma Brehostibar anepdang 2:30 ako shi nung asü.

Congress MLA Azad Zaman asüba osang angzükba sülen state kübok tesem balala nungi asükhu lemsatepogo.

Meghalaya Chief Minister Conrad Sangma-i Azad Zaman asüba osang angzükba asükhu lemsatepogo.

"Rajabala, Meghalaya nungi MLA Dr. Azad Zaman ajungbena asüba osang angzükba kanga aoksar aser



Azad Zaman (File photo)

jashir. Pa Garo Hills nungi lanur lenir tetangshi ka liasü, shibai nüburtem atema anibelem mesasai inyakogo. Par kibong den asükhu lemsateper. Pa tanüla tesunep nung anisüngzükdakjang," ta Conrad Sangma-i ashi.

Tripura: CPI-M lenir Badal Choudhury amak

Agartala, Metsüremi/March 4 (Agencies): CPI-M lenir tejen aser taoba mapang Tripura Minister Badal Choudhury Bodhbarnü "BJP goons" temi amak ta ashir.

Iba lendong ya South Tripura district, Belonia kübok Manirambai tesem nung ataloka liasü.

Iba tatalokba nung Badal Choudhury yiru aser pa indang gari dena samesa nisungtemi raksatsü.

"Taoba minister, CPI-M Central Committee züngsem Badal Choudhury aser party nungi tanga lenirtem tanü Manirambai, Belonia, South Tripura nung BJP party nungi samesa nisungtemi amak," ta

CPI-M-i ashi.

Badal Choudhury ya Manik Sarkar-i aniba Left Front State Government nung cabinet minister ka liasü aser pa tang Tripura Assembly nung opposition deputy lenir lir.

Kasa mapang nung CPI-M-i aitsüba BJP-i magizük.

Badal Choudhury amakba dak sendakba nung police-i bushitsüngdang tenzükgogo.

CPI-M-i ashiba agi, Agartala nungi km 110 shi pilar Manirampara yimtsüng nung Chowdhury aser tanga party lenirtem Dhananjay Tripura asüba anogo bilemtetba sentong ka agütsü atema sentong yanglua aliba mapang parnok amak.



TIR YIMYIM YIMOBILEM (EDITORIAL)

DIMAPUR ROGONÜ, METSÜREMI (MARCH) 05, 2021

CHIYONGTSÜ MERÜKA AMSHIBA

Anogo shia asenoki chiyongtsü tapu balala achiba ya taküm alitsü asoshi dang masü saka anema alitsü asoshi bilema achitsüla, kechiyong taküm aliyonga anema melira taküm malibaang tajungba ta asütsüsa timtem ajangshir. Ibayongji, nübortem chiyongtsü tamajung aser memerüki achiba aser ajemba ajanga timtem lendong majurutsü asoshi akok tashi yimteni azüoktsü meranger. Iba mapaji linük nung Food Safety and Standards Authority of India (FSSAI) ajanga repranger, anungji asenoki dokan nung chiyongtsü terenem aleper ayokba talep aser pongdang ajak nung FSSAI-i chiyongtsüji tendanger ayoktsü aser achitsü temelaba agütsüba tamaitü züngya ka agüja angutsü. Item ajakji state nung Health department ajanga reprangshiranga inyaker. Itemji meteta, asenok alidak tesem ajak nung, kadang nübortemi waishin meteta chiyongtsü ayokba mapatem mita reprangdir, iba jagi meteta aser memeteti tashidak wara aika nungi kümzüksü aser anema alitsü. Iba onük indang ya tanü asenok rongnung lemsatepdang, jet ta asen mulung nung asenoki asen alidak yimti yimdong nung manga medema aser auyi pongloka sadaka yur shi ango aser amsük-amsang ayokba angur. Iba denji, ano, asenok atema lapokba chiyongdak aser süngjemdak kecha memerüki awazüba asenoki angur. Item chiyongdak tesem aika nung chiyongtsü chia jemer temang nung timtem atalokba asenok karibo ajangshir alisü aser majangshiyonga angashir alitsü. Item ama timtem lendong nungi kümzüksü asoshi yakanü Mokokchung Municipal Council-i Chief Medical Officer den longjemer nübortem dang ayokba chiyongtsütem, talisa, shi alepitemi shi tajung lepa ayoktsü nüngdakba den shi ayokdak ki temerük aser tesadem asütsü nüngdakbatem indang shi alepitem den yimten aser lokti lenirtem ayongdena shisalemsatepbaji kanga nüngdakba sentong ka agiogo. Iba ama sentongji mapang, mapang shia tesem ajak nung ketdangsertemi ayongdena akaba ajanga tayokertem dang masü saka nübortemi dena chiyongtsü tajung aser temerük ayokba mapatem nung shilem agitettsü. Alima topur jungdaktsüba mapa aika lir aser item rongnung shishilembadak ki telong nung shilepitema dena süoshi temerük agir shi ango merükmerüka yoka anguba jagia alima topur junga angur. Asen taküm junga alitsüba malitsübaji, tongtibangsa, asen tebang nung kechikoma chiyongtsü enoker ta asüba dak tuluka keta lir. Aji oda, aseni achiba ak shi, nashi shi aser an shi amala ya tashidak maket shi tajunga ta kuli agütsür tepseta ayokba shitem asütsüla. Alima nung tashidak aika kiset shiruritem dak nungi pokteta menatepa aoba timtem aser takoksa asenok aikati ajangshiogo. Aji oda, an dak nungi adokba "Avian flu" aser nashi dak nungi adokba "foot and mouth" tashidaktem agi tang Cvid-19 agi tesama takoksa tia ajuruba ama, alima tesem balala nung aiben ajangshiogo. Iba ama tashidak poktetba mapang, tashidak nokdangtsü atema anema aliba an aser nashitem tapayu melii meyerijangsa meyerijang tepseta endokba osang asenoki angashiogo. Iba amaji, tashitemetet limatem nungbo tashidak ali mali tendanger külen dang shi aleptsü aser tazüa chinütsüka merükmerüka awazür agütsütsü. Item mapatem denji asen lima nung asenoki inyakba mapatem medemdangra, shi ayokdak shi tajung aiben mangutsü aser itemjia lenjang nung nisung ajaki ngua auyi ponga ayoker. Asenokbo tayokertemia yamaji ayoker, kechiyong itemji temulung agüja repranger mali, shingaia ola madoker. Atangji, shi achirtem asoshi dang masü saka shi tajung ayoktsübaji aser shi lepa ayokdak tesem merükmerüka ayutsübaji, shi lepa ayokertem asoshisa tongtibangtiba lir, kechiyong parnoka iba shi to achitsü aser anogo piyong, shi meyokma tashi, yangji amentsü. Shishilembadak tayokertem tia yabo talir aser taortemiang meteta lir. Item ajakji government-i repranga tayokertema, merükmerüka awazüa ayokba dang masü, timmedemi yoka amentsüsa government ketdangsertemi anepalutsütsüla aser nübortemia ajangshitsüla.

OLEMSABANG

MEYIPSHIA LUYIMER

- C. Lima Ozüküm, Mongsenyimt

Tiatem madak tia aluyimertem
Teyanglur temoatsü yanglok
Shimtetogo mongpu ajak nung süsür
Talenba maten rem lanu kibur
Süngzü maliba süngdong ainer mesük
Ya atangji Tsüngremer sentong.

Longjen longa aliba mapang kü tembar
Memeteter küm süi ne den
Taküm shia soyimer meditemi
Milung ajemshia chi amen mesük
Kü lenyim wangwanga ameta kümdaktsür
Ya atangji Tsüngremer sentong.

Tsüngküm mapa nungnai arua nükmener
Tzünglu mepungi bu asemer
Metsüjang aka asoba ngua pelar
Kinü tanur mesüzüker mesük
Mulung saladaktsür ayip ajanger
Ya atangji Tsüngremer sentong.

Züsen ajak nung talubosa moatsür
Yongyim kata metoktsü awabanger
Melep mezünga wadang kokdaktsür
Meyipshia luyimer takokma nung dang
Kusümonga ala-ohshia metoktsür
Ya atangji Tsüngremer sentong.

Anü maluba lima ama wangshir
Süngtzü tanang agi ni mesür
Arishi peyong sünepa anir
Angaka oa yimlaba tesema
Ochishir kabu kodanga makonger
Ya atangji Tsüngremer sentong.

ALIMA TENSA DEN APET KAKET

Nisung tain kati tebang o agi LKG tanuri jembiba jilushitsü kanga tasak. Zülutsüsa tasakba asütsü südi. Saka iba oshi nung Wb. P. Alem Jamiri tawa omeki lenrü kakat ka 'Mamatetba Küm Tatem School Benjong' sayaba nung Benjamin aser Retuuf na sensaksemba otsü lir. Tanü putu tensa electronic media, mapang telatet makai amshitepba wara ajanga kakat shisatsü bushiba nung tetsükdak adokdaktsüba tongpang ka lir. Item nungi jenbua alitsü shisa kangasa kaa zülutetogo. Iba kakat ya menurang adoker ta bilemer. Zülua alibatem ya shitak inyaktetra tanurji kodaser majungtsü. Shiri nendaka züngdir, parnoki moa! Kakat nung keta aliba aika rongnungi item onüktem nung telangzüba ngua pelar.

- Mobile phone kisung asayaa lira nisungbaji kechi tiai aitsü aser kechi mesüka akümstsü?
- Anojungi tanur nem mobile amoktsüra kechi asütsü? Tanur nem Mobile koda amshidaktsü nung ajungtsü?
- Medemer tajung ngutetba temoatsü kechisa? Kakat züngertemi shimang! etc.


Item dak alaka Smartphone ya headmaster kümdaktsür tanur den jembiba aser tarutsü tia (Future)-ji nisung kümdaktsür Benjamin den jembiba angudang jangraatemer. kakat ya kanga shisa kaa zülüogo.

- Mr. I. Supong, Dimapur.

Dt. 03.03.21

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazüngerü angateta agitsü mepishir

Nüngtugu Khristan counsellor Dr Larry Crabb süogo



March 04, 2021: Kanga nüngtugu Khristan counsellor aser Bible teacher, Dr Larry Crab alima nungi pilaogo; pa arrshi küm 77 liasü.

Crabb ya American Association of Christian Counselors nung Special Director liasü aser Colorado Christian University (CCU) nunga Distinguished Scholar-in-Residence liasü. Pa kanga mazüngi aliba taküm ka liasü, ajisiüaka pai kaket aika zülua kanga nüngtugu aküm.

Ministry organisation,

'Larger Story'-i sangdong ka ajanga, "Kanga tejashi nung aser tepela nung onoki Dr. Larry Crabb Amongnü anepdang kodaki aoba sangdonger. Pa menungraba agi onok melung shiranger, ajisiüaka pa kodak nung benjungtepdar ta meteta onok pelar," ta metetdaksü.

CCU Tir, Dr. Donald W. Sweeting-i, Dr. Larry Crabb asüba osang angashia University-i mangyimer; pa ya advocates aser tembartem rongnung tajungtüba liasü, ta ashi.

Dr. Donald-i, "Küm aika pa ya CCU nung lenir ka, shisa sayur ka aser tanela tsütsü tesayur ka liasü. Pai Khrista tiyongtsü südaktsür inyak aser pai counseling agütsüba ajanga nisung aika taküm nung temelenshi adokdaksü. Colorado Christian University nung ajaki pa kanga menungratsü," ta metetdaksü.

2018 küm November ita nung CCU-i University Counseling atema Larry J. Crabb Center lemezükja liasü. Iba Center nung mental health professionals aser counselling interns aika lir aser parnoki CCU indang Lakewood campus nung undergraduate students 1,400 dak tema nem counselling services agütsür.

"Dr. Crabb tang Kibuba den lir, ta meteta onok melung nung tesünep lir. Iba denji külemi onoki pa kinüngtsü, chirnur aser semchirtem den külemi mangyimer. Onoki ajak dang Crabb'er kibong nem tesünep agüjang ta sarasademtsütsü ayongzüker," ta Donald-isa metetdaksü.

Myanmar Police-i Baptist Arogo Tenla ki raksatsü; putir pezü apu

March 04, 2021: Mongolbarnü (March 2) Myanmar police-i linük nung democracy pusema longkak aitertem anema tashiyim amshiba mapang nung nisung aika yirutsüogo.

Taküm February 1 nü Myanmar nung sepaitemi lenirtem aika pua emergency sangdongba sülen nungi tenzüka tang tashi nung longkak aiter 18 tashi tepsetogo aser nisung aika puogo.

Mongolbarnü longkak aitertem police dang nungi ajenba sülen Arogo Tenla ki ka

nung jenokba mapang nung police arua Tenla ki kikümbang raksatsü.

Police-i nisung aika apu aser parnok rongnung Baptist Arogo nung putir 4 densema lir.

Osangbener den jembidang Arogo lenir, Sin Wah Aung-i, "Police-i nisung ter puer ao. Police indang gari agi Tenla ki kikümbang tsüngboka raksatsüba sülen parnoki longkak aitba nung shilem magirtema densema puer ao. Police-i Tenla ki kishitem-a raksatsü," ta metetdaksü.

Putir pezüji KD Naw Mai,

Hkawng Lwam, Zaw Dwe Aung aser Saira Aung nunger lir.

Myanmar linük nung police-i longkak aiter meyirjang aika puogo, nisung 18 tepsetogo aser aika yirutsüogo.

Osang angazükba agi, police-i Yangon, Dawei, Mandalay, Myeik, Bago aser Pokokku yimitem nung longkak aitertem dak injang khaloktsüba agi nisung aika asü.

Myanmar nung ruling military council-i yimsüsüba tenzüka sülen nungi tenzüka joko hopta asem dak tali anogo shia nüburtemi longkak aitar.

'The Voice' takok angusang Jordan Smith-i Khristan kensep sayatsü

March 04, 2021: "The Voice" season 9 takok angusang, Jordan Smith-i, Tsüngremi pa nem sempet agütsüba atema pai Tsüngrem nem tenüngsang agüja Khristan kensep ka sayatsü, ta metetdaksü.

Osangbener den jembidang pai, "Ni Kibuba dang kü ajak Pa sentsüwangshi atema amshiang ta sangdonger, Pa otsü ashitsü aser Khrista osangtajung proktsü atema ni yariang ta mepishir," ta ta ashi.

Tawa pai Provident Label Group/Sony Music den tezüngzüktep ka agiba sülen pa indang kensep nungi mezüngbuba ken "Great You Are" sayaogo.

"The Voice" tetoktepa nung shilem agir kentenertem rongnung 'highest-selling artist' ji Smith lir. The Voice nung shilem agiba sülen pai pop kensep ana den Christmas record ka sayaogo.

Pa indang ken aika nung pai pa tamang jenjang indang



lemsatepa lir, ajisiüaka tang mezüng pai Khristan kensep temeja adoker.

"Great You Are" ken indang jembidang pai, "Onoki iba ken züluba mapang nung iba ken yabo khenyongi balaka ta ni meteta liasü," ta ashi.

"Great You Are" ken ya Smith den Jeff Sojka aser Matt Armstrong nati yaritepa zülü. Laishiba nung, nisungtemi Yisu nem tenüngsang magütsütetra lung-ia ayimdensü aser tenüngsang agütsütsü, ta shia aliba nung ajemdaker zülü.

Kenjang nung, kü ajak Nü nem bendanga agütsür aser ni ibaji Nü nem meyipa agütsür ta shia lir.

Smith-i pop ken aika yangluogo, Christmas ken-a aika yangluogo, ajisiüaka tangbo pai Tsüngrem nem tenüngsang agüja osangtajung ken temeja kensep adoker, ta metetdaksü.

Smith-i ken tasenba ya coronavirus wara metenzükdang zülua liasü, aser pai ashiba agi, iba wara mapang piyong pai Tsüngrem dak jenoka liasü.

ANOGO ABEN TSÜNGREM DEN

Anatsülen

1 Korint 12:12-27

Nenoki osangtajung tamang atema merangtepa, nenok tanela ka nung, temulung ka sür akangakanga noktakang. Filipi 1:27

"Kong ana mesüra asem kü tenüng nung sentepa lir, idakji Ni dena lir." Mathi 18:20.

Ibai arogo Kiburi Khristan telok tekülemertem nem agütsüba senti tenangzükba lir. Khristantem telok iba temang nung lungjema alir. Pauli tenzükba mapang arogotemji tamang aser tesayuba nung lungjema liasü. Kodang Yirusalem ayawara adoka nüburtem timtema liasü, Pauli nüngdakba purtemji yaritsü ajungshi.

Kibuba Yisui Pa nütsüngtem nem agütsüba mapaji tulu liasü- alima ajak nung sayutsüngtsüba. Kija Khristan kati iba mapa tulu inyaktsü makok. Telok kati dang ibai inyaktsü makok saka Khristantem aser telok telungjem agi dang Khristai agütsüba mapaji Pa asoshi inyaktsü akoktsü.

Kong telok aser arogo tamang aser tesayuba nung lungjemer noktaker Khrista asoshi mapa inyaker iba telok aser arogo temoatsüba. "Asenok melemsa; ajak temang ka, teyima ka aser tesayuba ka, temeim ka nung." Iba arogo tashi tait army ama tejakleni aotsü aser Khrista asoshi alimaji akoktsü. Khrista Yisu nung tamang ka sür asenoki lungjemer ajaklen noktaker shirnok asenok den lir parnok nem Khrista osangtajung temerükji agüja parnok nem teti taküm agütsür.

Onok arogo tashi itdakjang, temeim Kibur, iba telungjem jagi onok Nai mulungba inyaktsü. Amen.

Yihuda nungeri Yirusalem nung Tenla ki rongdoktsütsü merang

Jerusalem, March 04 masü saka ken o jembiba aser (Agencies): Orthodox Yihuda akhümtsübutep jenjang nungeri Yirusalem nung raksatsr," ta parnokisa Romanian Orthodox Arogo anema maneni inyakba atema Assembly of Catholic Ordinaries of the Holy Land (ACOHL)-i sashia aitsüogo.

Orthodox Yihuda nungeri Jerusalem kübok Musrara nung aliba Arogo Tenla ki rongdoktsütsü merang; iba Tenla ki ya Jewish Quarter anasa lir.

ACOHL-i sangdong ka ajanga, Yihuda nungeri Tenla kidangji mi senoktsü, ajisiüaka Arogo nung putir kati miji ensep; surveillance cameras ajanga Orthodox Yihuda nungeri mi senoktsübaji tangoka lir, ta metetdaksü.

"Ita ka tsüngda nung tang agi pezübenbuba iba Arogo anema inyaker. Ketdangsertemi ashiba agi, Orthodox Yihuda nunger dak melung malemer," ta ACOHL sangdong nung shia lir.

"Onok, Catholic Arogotemi Orthodox Arogotem aser Yirusalem nung Khristantem den longjemer item ama mapaji sashia aitsür. Iba mapa ajanga Khristantem jashidaktsüba dang

Orthodox Yihuda akhümtsübutep jenjang raksatsr," ta parnokisa Romanian Orthodox Arogo anema maneni inyakba atema Assembly of Catholic Ordinaries of the Holy Land (ACOHL)-i sashia aitsüogo.

"Iba ya ajanga yimti nung tamangba lotkti balala tesünep nung aliba jenjang raksatsür," ta shia ACOHL-i Israel nunger ketdangsertem dang iba tatalokba junga bushisüngdangtsü aser aibelenertem nem temerenshi agütsütsüla, ta takhangba agütsü.

"Yimti nung aliba yimtenren party ajak aser tamangba lokti ajaki iba tatalokba ya aitsütsüla," ta paisa metetdaksü.

Ano külen, Archbishop of the Greek Orthodox, Atallah Hanna-ia, "Item ama mapa ya onoki aitsür. Arogotem, Khristantem aser Khristan temaitsütem raksatsüba ya yimsü alia amangertemi inyakbalir aser tangar akhüm metsüburtemi lir," ta metetdaksü.

"Maneni iba Arogo anema inyakba ya iba Arogo nungi putirtem mindoktsü aser iba tesem nung Khristantem magizüktetba temaitsü lir," ta paisa metetdaksü.

OLONG PAITEP # 5743

	1			2			3		4
5							6		
7			8						
							9		
		10							
11									12
				13					
				14					
15									
				16					

TIPILEN	LANGTSÜNGLEN
1. Balaka - (5)	2. Hai sür inyak - (4)
6. Aika shirangba - (4)	3. Aor tenüng ka - (6)
7. Tar tatsü - (6)	4. Ali telungi talangka lur - (5)
9. Nenü'er jabaso - (4)	5. Tebang kenyongi mazüoker - (4)
10. Sen latettsüba - (7)	8. Ken atema anenzükertem - (5)
11. Tangar kübok alir - (4)	9. Toktepa noktak - (5)
14. Lon nung inokba - (6)	10. Sen - (6)
15. Tzü ayimdak - (4)	11. Benjong agi - (5)
16. Ajok - (5)	12. Telung nung rizünga ayu - (4)
	13. Tebang nung enok - (4)

OLONG PAITEP # 5742 TELANGZÜBA

TIPILEN :	LANGTSÜNGLEN :
1. Aben, 4. Artsü, 7. Lisem, 8. Liwa,	1. Aruli, 3. Balala, 5.Suwar, 6. Belem,
9. Sarasadem, 12. Aket, 14. Mangu,	9. Sүjak, 10.Aonung, 11. Dokan,
15. Anünü, 16. Ango.	13. Tinu.



CHIDIYUNGDI LOKTI-TENTET

Alokba : Hai temba Sobang...ner telok aonung shia adenshir kanga asatepa rongrongtepa meeting litepba ya kechi ka atema yamai longso teper aka...???

Sobangba : Ena temba...ozü telok ya sen saruteper, kibong shia khangtepa sen tetemlok (interest) agi amshir...Aser meeting aliba shia sorochioka chiyungteper...Ajiser küm shia küm tatem nung ak lepseta chi chiyungteper...Shi lema bener senshir. Iba atemaji aonung shia senteper asatepa rarateperba aja ya...

Alokba : Waaamaaa...Sen khangtepa saruteper ak lepseta chi chiyungteptsüba atema telok tenteta ayuba aja...!!!??? Surabang iba tentetba tajangzükji kibong kar nungbo lir mali...???

Sobangba : Eeesssh...Oda tangar dang koda mashi...Kibong anabo ali-kimong ajunga sentsüh yong tangari agiadokogo...Ano kibong kabo taoba hopta nung-to tangar kari arua ki dala (lock) tulu ka agi shibangtsüogo.

Alokba : Waaammaa...!!! Surabangla iba chidiyungdi lokti-tentet jibo anenadokang tajungba masü noo...!!!??? Iba telok tentet-jibo oda mali-ang tajungba ado...

Lilir : L.Kika Pongener.

TANÜBO NAI LANGZÜANG

Q. PSLV-C51 ya ISRO indang ____ Polar Satellite Launch Vehicle mission lir.

- A.53buba B.52buba C.51buba D.50buba
 _____ (Taruba adok nung onoki langzүtsü)

YASHI ADOK TELANGZÜBA : 2000

AO OSHI ANGAZÜKDAK:

TANÜ ANGAZÜKTSÜBA OJANG

Aen

(n.) Bendanglen (out of station)
 * Ni aen talangi aotsü sentong lir.

Aener

(n.) nisung tasen (stranger)
 * Ozü kidang aener ka anena lir.

NAI-A YA METETTER MA?

ALIMA NUNG JENJANG TULU AKETBA

SAISAPONG TENTETTEM:

(Yashi adok nungi...)

- Jeffrey Lurie - \$3.13 billion
Properties: Philadelphia Eagles
- Stephen Ross - \$2.96 billion
Properties: Miami Dolphins, International Champions Cup, Drone Racing League*
- AMB Group - \$2.95 billion
Properties: Atlanta Falcons, Atlanta United, PGA Superstore
- Buss Family Trust - \$2.91 billion
Properties: Los Angeles Lakers
- Ricketts Family - \$2.88 billion
Properties: Chicago Cubs, Marquee Sports Network

SUDOKU # 5784

TELANGZÜBA # 5783

8	1	5		7	3	5	7	4	9	8	1	2	6		
7			6			6	8	1	5	3	2	4	9	7	
	4	2		8		4	2	9	6	1	7	5	8	3	
	7	8	2	4	7	1	3	8	2	5	6	4	9		
4			9	1	6	3	2	9	6	1	4	3	8	7	5
5	6	1					5	4	8	7	6	9	2	3	1
6					5		8	3	5	2	7	1	9	6	4
2	3		7	4	1	8	1	7	4	9	8	6	3	5	2
	7		9	5	4		9	6	2	3	5	4	7	1	8

OJANG LUTEP # 5330

- MEITEM :
- MNGEKOÄ :
- MBÄKÜÄ :
- NGÄÄJÄ :
- NGNISU :
- ÜNGTSDÄ :
- NDÄKTESETEP :
- NGMEJUI :
- MAKÜ :
- ERÄO :

OJANG LUTEP TELANGZÜBA # 5329

TELOK NUNG KARI LANGKA INYAKER PELATEPDANG
 KARBO IBAJI NGURTENÜKMEREMER

TAN HOPTA ATEMA - KOMA SÜLA ?

Q. Nagaland nung yi ayokba dokan odia lapokdaksü nunga koma süla?

Jharkhand nung IED apokba lendong nung sepaia asü; asem yiru



West Singhbhum (Jharkhand), March 04, 2021: Brihostibarnep Jharkhand nung West Singhbhum kübok arem ka nung Maoist telungpurtemi IED bomb amshia sepaitem amakba tesem nung Jharkhand Armed Police aser CRPF sepaitem adenshia aliba noksa nung angur. Iba lendong nung sepaia asü aser asem yiru.

West Singhbhum (Jharkhand), March 04 (Agencies): Brihostibar anepdang Jharkhand nung West Singhbhum district kübok Hoyahatu yimtsüing anasa aliba arem ka nung Maoists telungpurtemi ali telung nung improvised explosive device (IED) bomb ka rema yutsür pokdaksüba lendong nung Jharkhand Jaguar (JJ) unit nungi sepaia aser sepaia asem yiruogo, ta police osang ka ajanga metetdaksü. Jharkhand Police-i, Toklo

police station kübok Hoyahatu yimtsüing anasa aliba arem ka nung Maoists telungpurtemi iba lendong agütsü, ta metetdaksü. Iba lendong nung asür anaji Constable, Hardwar Shah aser Constable, Kiran Surin na lir ta jangjaogo aser yirua alir asemji helicopter ajanga Ranchi-i anir oa mozükidang yaridar. "Brihostibar anepdang 8:45 ako meta police team den CRPF (Central Reserve Police Force) team aser Jaguar Assault team-i temporary camp ka melentsü lia iba lendong ya atalok," ta

Jharkhand Police-isa metetdaksü. Iba lendong atalokba sülen sepaitemi Maoists telungpurtem anema operation tenzükogo. CRPF-i sangdong ka ajanga, "Tanep 8:45 ako meta West Singhbhum, Jharkhand nung aliba Hoyahatu yim anasa arem ka nung IED bomb ka apok. Iba lendong nung State Police Jharkhand Jaguar sepaia asü aser ana kanga mejungi yiru. Kasa lendong nungsa 197 Battalion CRPF nungia sepaia ka yiru," ta metetdaksü.

Yaküm alima nung internet shibangba shilem 70 bo India nung liasü

New Delhi, March 04 (Agencies): 2020 küm alima nung internet shibangtsüba shilem 70 jungnüabo India linük nung liasü, ta digital rights & online freedom atema inyakba telok- Access Now report ajanga metetdaksü. Alima nung internet 155 ben shibangtsüba nungi 109 bo India nung liasü, tanabuba jengang nung Yemen linük liasü (6). "Shattered Dreams and Lost Opportunities," report nungji yaküm linük 29 nung internet shibangtsüba mesüra internet

majungba indang shia lir. "2018 aser 2019 küm ama 2020 küm nunga internet shibangtsüba timtibaji India linük nungsa liasü, ibayongji alima nung maaksütsü temaba jengang angu," ta report nung shia lir. India kübok Jammu & Kashmir nungbo 2020 kümpiyong 4G internet services maliasü, ta kasa report nung shia lir. Parnokisa, ketedangsertemi kuli tejangja makai internet shibangtsüba yimya aitsü. Access Now-i ashiba agi, 2020 küm India nung internet

shibangtsüba kuli tulutibaji lendong paidoktsü atema liasü, iba sülen linük nung security amokmeren aser olulu prokba nokdangtsü kulitem densema lir. "Osang tai mesüra tesempa o prokba nokdangtsü atema, ta kodang ketedangsertemi shidir, ibaji yimtenren tashi maitba, tamangba lokti tsüngda raradang police-i tashiyim amshiba mesüra amakba, nüburtemi longkak aitsü atema ayongzükba nokdangtsü atema merangba asütsüa akok," ta report nung shia lir.



Amritsar, March 04, 2021: Centre sorkari benokba aluyimba ozüing tasen asem anema longkak aitsü atema Brihostibarnü aluyimertem Amritsar nungi Delhi-i apusoa aotsü lia tangokba noksa nung angur.

Assembly Election jakdang BJP election committee senden amen

New Delhi, March 04 (Agencies): State pezü aser Union Territory ka nung assembly election agitsü mapang ana nung lia Brihostibarnü Ato kilonser, Narendra Modi mendenbuba ser New Delhi nung aliba Bharatiya Janata Party (BJP) headquarters nung BJP election committee senden menogo, ta party osang ka ajanga metetdaksü.

BJP National Tir, JP Nadda nungera aden. West Bengal nung March 27 nungi tenzüka shilem ti lemsar assembly election agitsü aser May 2 nü votes zünga election osang sangdongtsü. West Bengal dak alia Tamil Nadu, Kerala aser Puducherry nunga anogo ka kija nung election agitsü aser Assam nung shilem asem lemsar election agitsü.

Ato kilonser den BJP bangdak lenirtema Central Election Committee (CEC) senden nungji aden. CEC ya party nung telemteba agiba tentet tulutiba lir, aser talisa parnoki party-i shimtetba candidate tem tesüsa shimmer.

February 26, 2021 nü New Delhi nung osangbenertem senden ka ayongzükba Chief Election Commissioner, Sunil Arora-i state pezü den UT ka nung assembly election agitsü atema anogotem sangdonga liasü.

Iba senden nung West Bengal aser Assam assembly elections atema party candidate tem shimogo, ta osang angazüker. CEC senden nung Union home minister Amit Shah, Union minister of road transport & highways, Nitin Gadkari aser

Assembly election pongu nungji menden 824 atema polling station lakh 2.7 alitsü aser voters crore 18.68 lir, ta pai metetdaksü. Coronavirus wara aliba nung ajemdaker elections nung tokteptsü atema candidate temi online ajanga dang nominations file asütsü aser vote agütsüba mapang ghonda ka tali melatsü.

India nung nisung alitsü atema yimti tajungtibaji Bengaluru lir



New Delhi, March 04, 2021: Brihostibarnü New Delhi nung Union Housing & Urban Affairs Minister, Hardeep Singh Puri-i 'Ease of Living Index' sangdongba mapang tangokba noksa nung angur.

New Delhi, Metsüremi/ March 04 (Agencies): Brihostibarnü India sorkari 'Ease of Living Index' sangdongogo; linük nung aliba yimti 111 nungi nisung alitsü atema yimti tajungtibaji Bengaluru yimti shimogo, iba sülen Pune, Ahmedabad, Chennai, Surat, Navi Mumbai, Coimbatore, Vadodra, Indore aser Greater Mumbai yimtiem lir.

tamajungtibaji Muzaffarpur lir. Nisung million 1 dang nungi timba aliba yimtiem rongnung Ghaziabad aser Meerut na jengang 30buba aser 36buba na nung lir, Allahabad jengang 32buba nung, Patna jengang 33buba nung aser Faridabad jengang 40buba nung lir. Yimti tajungtibatem ya lenla pezü nungi asadanga liasü; item rongnung yimsüsüba, loktiliba, anema-alibaren aser rongsenkettsüing terenlok lenlatem lir.

Union Housing & Urban Affairs Minister, Hardeep Singh Puri-i sangdongba 'Ease of Living Index' nung, nisung million 1 dang nungi tajemba aliba yimtiem rongnung yimti tajungtibaji Shimla lir.

Sorkari ashiba agi, 'Ease of Living Index' ya taküm libaliro asadanga lir aser yimtiem nung terenlok atema inyakba mapatongtem asadanga lir.

Nisung million 1 dak tema aliba yimti 49 rongnung Bengaluru yimti temaba jengang nung lir, Delhi jengang 13buba nung lir aser Srinagar yimti tamajungtiba lir.

Yimti 111 nungjagi nisung lakh 32-i 'Citizen Perception Survey' nung shilem agia liasü. "Item yimtiem ya terenlok atema tatishitsütem lir; item yimti ajanga tanga yimtiemia junga inyaksü atema ajungshitsü," ta Puri-i metetdaksü.

Kasa category nungsa Bhubaneshwar yimti tanabuba jengang nung lir, tasembuba jengang nung Silvassa lir, iba sülen Kakinada, Salem, Vellore, Gandhinagar, Gurgaon, Davangere aser Tiruchirapalli yimtiem lir.

Ano külen 'Municipal Performance Index 2020' nung tajungtibaji New Delhi Municipal Council lir, iba sülen Tirupati, Gandhinagar, Karnal, Salem, Tiruppur, Bilaspur, Udaipur, Jhansi aser Tirunelveli yimtiem lir.

Nisung million 1 dang nungi tajemba aliba yimti 62 rongnung nisung alitsü atema yimti

PM Khan atema Pakistan Senate nung confidence vote agiteptsü



Islamabad, Metsüremi/March 04 (Agencies): Pakistan indang Senate elections agidang tongtipang menden kar nung tamakok ajuruba sülen Parliament nung Ato Kilonser Imran Khan asoshi vote of confidence agiteptsü, ta party ketdangsurtemi ashi.

Parliament indang upper house züngsem 96 aliba Senate nung menden 48 asoshi Bodhbarnü election agia legislator temi anogo tepiyong provincial assembly aser Parliament indang lower house, National Assembly nung vote agitepa liasü.

Iba election indang osang ya Brehostibarnü sangdongtsü imlar, saka official masüba osangtem ajanga Khan'er Pakistan Tehreek-e-Insaf (PTI) party ya National Assembly nung tamakok ajuru, ta sayur,

kong opposition candidate-i PTI nungi Abdul Hafeez Shaikh madak takok angu, ta ashir.

Tejangja masüba osangtem ajanga ashiba agi, opposition Pakistan People's Party (PPP) nungi taoba Pakistan Ato Kilonser Yousuf Raza Gilani-i tang finance minister inyaka alisang Shaikh madak vote 169 nungi 164 tsüngta agi takok nguogo.

Iba osang ya Khan'er PTI asoshi majung lir, kechiaser par telok aser parnok telok den sendaktepa alirtemi National Assembly amokbanga lir, aser secret ballot amshia vote agütsüba mapang par züngsem mesüra sendaktepa alirtem kari dangar nem vote agütsü südi, ta ashir.

Iba osang sangdongba sülen PTI lenirtem aser Pakistani Foreign Minister Shah

Mehmood Qureshi nungertemi linük yimtiba, Islamabad nung osangbener senden ka nung jembiba mapang, opposition teloki ozüng yanglurtem indang vote bener aotsü atema ochimashi mapa inyak, ta tai tongloksü.

"Iba house nungi vote of confidence agiteptsü asoshi Imran Khan aser par party-i molungsoa telemtetba agiogo," ta Qureshi-i ashi.

Khan'er PTI teloki Senate nung taoba mapang menden 14 ngua liasü aser tang menden 26 angutsü, ta osangtem ajanga ashir.

Ajisüaka Parliament indang upper house nung opposition tem tera agi timba akumtsü akok, kong PPP teloki menden 20 aser Pakistan Muslim League-Nawaz (PML-N) teloki menden 18 angutsü imlar.

PPP, PML-N aser par den sendaktepa aliba telok ajak senteper menden 53 angutsü asadanteter, aser Parliament indang upper house amokbangtsü teperi akumer.

Pakistan nung züngsem 96 aliba upper house züngsemtem ya küm trok kümsük atema shimmer, aser küm asem nung züngsem tesaadang atea election agir. Senator tem ya provincial lawmakers aser lower house züngsemtemi shimer.

Maoist nungi jakzüka aoba telok den Nepal sorkari yimjung yanglu

Kathmandu, Metsüremi/March 04 (Agencies): Nokdanga aliba Maoist nungi jakzüka aoba telok kati azüdokshi mapa meinyaktsü nangzükba sülen Nepal sorkari yimjung tezüngzüktep ka yangluogo.

Azüdokshi mapa inyakba telok, Unified Maoist party nungi jakzüka aoba Communist Party of Nepal (CPN) aser sorkar tezüngzüktepba ya Kathmandu nung zülutep, ta Home Affairs Minister Ram Bahadur Thapa aser CPN odongtar Khadga Bahadur Bishwakarma nati sangdong ka nung ashi.

Sorkari iba telok nem tenokdangba agüja aliba agientsü, party züngsem aser parnok busemertem tepuokdak yua aliba ajak choiktsü aser parnok anema ken o benoka aliba ajunga agientsü molung, aser iba telok yagia azüdokshi mapa ajunga yutsütsü aser ken o ajak tajunglen nungi jembishinüa angateteptsü molung, ta sorkari iba yimjung ken o jembiba sülen Brehostibarnü sangdong ka nung ashi.

Iba tezüngzüktep indang tejangja ya nüburtem nem Hokulbarnü sentong ka nung metetdaksütsü, kong Ato Kilonser Khadga Prasad Sharma Oli aser telungpur telok nungi lenir, Netra Bikram Chand adentsü. Netra Bikram Chand

dang par teloki Biplab ta ajar. CPN ya Unified Maoists nungi jakzüka ao, shirnoki sorkar meyong sepai den 1996 aser 2006 tsüngta rara aser iba mapang nisung 17,000 dak tema asü, noklang aika sama aser iba dang tali yiru.

Maoists temi 2006 küm November ita yimjung tezüngzüktep ka zülua nok-o-nü yutsü aser United Nations-i asameyanga yimjung ken o jembia yimtenren nung shilem agi tenzü.

CPN ajanga bomb pokloksüba, rakzükraktemba aser civilian tepsetba mechi 2019 küm Ato Kilonser Oli'er sorkari iba telok ya mapang tamajung inyakba telok ka, ta sangdonga liasü.

Iba telok nungi lenir aika tepuokdak lir aser aika anema ken o balala benoka lir.

Maoist teloki sorkar anema nokdakba tembanger küm 15 jungnüa arudang mapang shia azüdokshiba linük tila nung Brehostibarnü tenzüngzüktep agiba ajanga teti asoshi yimjung alitsü teimla agütsür.

Ato kilonser aser par sorkar nung yimtenren tsütsü party nung telemsa adoka aser pai anentsür aliba parliament tanaben Supreme Court ajanga tenzüksütsü aliba mapang ka nung iba tezüngzüktep ya yanglur.

Brazil nung COVID-19 tesashiba akumer

Brasilia, Metsüremi/March 04 (Agencies): Brazil nung ananü atonga coronavirus tashidak den sendaktepa asür tali akumba mapang Sao Paulo state nung "cod red" COVID-19 tenokdangba tasen sangdongogo.

Tesüba ghonda 24 tsüngta nisung talila 1,910 asü aser nisung tasen 71,704 dak COVID-19 putet, ta iba linük indang heath ministry ajanga Bodjbarnü ashi.

Brazil nung ananü atonga nisung onsara asüba osang sangdonger.

"Tashidak wara tenzüker tang mezüngbuba asenoki linük tesem ajungalen tensa tamajungba akumba angur. Tensa ya taoksatsüka lir," ta public health institute Fiocruz ajanga ashi.

Brazil nung coronavirus dak sendaktepa asüba nisung 257,000 dak tali lir - koba alima nung United States sülen tanabuba jenjang nung lir - aser COVID-19 cases million 10.6 dak tali lir, ta Johns Hopkins University ajanga ashir.

Brazil Tir Jair Bolsonaro-i iba virus süoki ia magizükba aser public health tsütsü mera agiba shishia magizükba asoshi nüburtemi pa aitsür aser pa anema longkak aiter.

Sorkari COVID-19 mozü alizüka alemtsü aser agütsütsü nunga timtem ajurur.

Virus prokshia aoba



Sao Paulo, Brazil nung aliba Pacaembu soccer stadium parking lot nung teintet rogotem asoshi COVID-19 mozü agütsüba tesem ka amenoka alidak nisung asem gari nung mener Sinovac COVID-19 mozü agiba noksa nung angur.

azüoktsü mechi Honibarnü nungi tenzüka hopta ana partial lockdown alitsü, ta Sao Paulo State Governor Joao Doria-i Bodhbarnü sangdong.

Bar aser restaurant tem melapoktsü saka tsüngtong oa agütsütsü aser mall aser tongtipang masüba business tem shibangtsü, ta governor-i osangbener senden ka nung ashi, saka school, tekülem ki, jang-o-tzü ayokba dokan aser health services tem lapoka alitsü.

Nütsüng yongsük million 46.3 aliba state, Sao Paulo nung minute ana shia intensive care-

i nisung ka anir arur aser health system laotsü tia ka nung lir, ta Doria-i ashi.

"Ibai na tai lir. Nai süoki ia magizükba ajanga ya ataloker," ta pai Bolsonaro aitsü.

"Brazil nung anogoshi nisung 1,000 dak tema asür. Ibai anogo nung tayimtsü ka tsükokba amai lir... Nai inyaktsü tim meinyakba ajanga Brazil nungger aika tasü mang remogo."

Bolsonaro-i lockdown ya maneni aija liasü.

"Nai metsüputsüla, kidang alitsü sentong tanaben tenzüksüba ya tai. Nüburtem aya aser shisabulu agi asütsü,"

ta pai pa busemer telok ka dang ashi.

Bolsonaro-i tashidak wara azüoktsü merangba maparen ajunga tajemba kumdakja arur, ta Sao Paulo nung epidemiologist Julio Ponce-i osangbener dang ashi.

"Asenok lockdown alitsü nüngdaker, asenok mask agitsü nüngdaker aser virus nungi kumzüka alitsü asoshi mozü peria magi tashi social distancing yimyatam amshitsü nüngdaker," ta pai ashi.

Brazil nung iba tashidak wara tesashiba akumba asoshi tebilemtsü tuluba akumer, kong

temelaba menatepa aoba novel coronavirus tapu tasen ka Amazonas state nung taoba küm nguteta liasü.

COVID-19 tashidak menatepa aoba tali akumba aser oxygen densema medical supply peria manguba ajanga Amazonas state yimtiba, Manaus nung küm tetenzüklen health system tebilemtsü tulu liasü.

Brazil nung COVID-19 tashidak prokshia aoba mazüoktetra, virus tapu tasenba jateta adokdak tesem tiyong ka akumtsü aser ibaji ajanga tali menatepa aotsü aser lendong tulu asütsü, ta mongintemi tekümdangtsü shiogo.

Health Minister Eduardo Pazuello-i ashiba agi, liability clauses nung mangatetep ka aliba ajangteta COVID-19 mozü alitsü atema Pfizer Inc den tenzüngzüktep yangluba tatemleni arur.

Sorkari Pfizer dang COVID-19 mozü ya doses million 100 aser Johnson & Johnson indang pharmaceutical subsidiary, Janssen dang nungi doses million 38 alitsü tebilemba lir, ta ashir.

"Tashidak wara indang tensa tamajungtiba ka tongogo. Coronavirus tabu balalai asenok dak kongshir," ta Pazuello-i ashiba video ka social media nung prokshia.

Brazil nung coronavirus mozü ya May ita tashinung angutsü imlar, ta paisa ashi.

Nagaland nungi matamabensar artist temi 'Divya Kala Shakti' nung shilem agiogo



Dimapur, Metsüremi/March 04, 2021 (TYO):

Matamabensar/tangar memenep alir lanurtemi parnok dak aketba sempet tajung nübur dang sayutetsü asoshi sabang ka agüja aser parnok sempet ajungkettsütsü nükjidong nung, Brehostibar nikongdang 5:00 ako meta Dorjee Khandu Convention Center nung 'Divya Kala Shakti' ta nungja agütsür mezüing regional sobaliba sentong ka ayonga agiogo.

Iba sobaliba sentong ajanga arts, music, sobaliba tsüingsang, yoga aser martial arts sabang nung matamabensartem indang sempet sayudaktsütsü aser parnok sempet temaba jenjang kati ajungkettsütsü nükjidong lir.

North East state ajunga nungi tangar memenep lanur 55 agi iba sentong nung shilem agiogo. Arunachal Pradesh nungi nisung 11 aser Delhi, Odisha den West Bangal nungi

jaokba nübutemi sentong nung denogo.

DEPWD, ministry of Social Justice and Empowerment, GoI tawabangba kübok, Social Justice and Empowerment and Tribal Affairs (SJETA), WCD and Health den Swami Vivekanand National Institute of Rehabilitation Training and Research, Cuttack, Odisha indang department tem longjemer iba sentong ayongzük.

Nagaland tenüing nungi Indigenous Music and Folk Art School of Indigenous Cultural Society Dimapur nungi matamabensar artist temi iba sentong nung shilem agiogo. Nagaland nungi shilem agir artist rongnung tenarong tajak aser o mejembiter nisung pezü aser 'intellect' ka dena liasü aser Children Folkdance tesayur Kili H. Chishi aser Atuna H. Chishi (coach aser

assistant coach ama) nati aser escorts-i anir parnoki iba sentong nung shilem agiogo.

Nagaland team-i Sümi Naga sobaliba tsüingsang sayu aser 'traditional cotton spinning' den akhi tetsü tebou ken tema aser indigenous music tem sayua liasü.

Iba sentong nung Brig, (Dr.), B D.Mishra (Retd.) tongti tesemdang ama jaok. Kasa mapang, Minister, Social Justice & Empowerment GoI, Shri.Dr. Thaawarchand Gehlot, Hon'ble Chief Minister AP., Shri.Pema Khandu, Hon'ble Minister Social Justice and Empowerment and Tribal Affairs, WCD & Health Shri.Alo Libang aser Secretary DEPWD, GoI., Ms. Shakuntala D. Gamlin nung tetushi tesemdang ama sentong nung denogo, ta sangdong ka ajanga metetdaksü.

AR-i Noklak aser Kiphire nung sentong ayongzük

Noklak, Metsüremi/March 04, 2021 (TYO): HQ IGAR (North) kübok Kiphire Battalion indang Assam Rifles-i Mongolbarnü (02.03.2021) Noklak District kübok Thongsonyu yimtsüing nung "Skill Development" omen nung ajemdaker lecture sentong ka ayonga agiogo.

Lisopurtem tsüingda teka mapa shia meteta aliba aser pei poksüing atema aazükba den taküm nung pelaa alitsü asoshi

mapa meteta aliba tajangzük balala indang nung tesayuba agütsütsü nükjidong yur iba lecture sentong ayongzük.

Iba lecture sentong nung yimer 20 dena liasü.

Nübutem tenük lapokdakja aser tali saksalema lidaktsütsü asoshi iba lecture sentong tajung ayongzüksüba atema yimertemi Assam Rifles dang pelaba metetdaksüogo.

Maneni, HQ IGAR (North) kübok Kiphire Battalion indang

Assam Rifles-i Akhegwo Govt High School, Kiphire District nung 'Today's Youth Tomorrow's Future omen nung ajemdaker lecture sentong ayongzük.

Iba lecture sentong nung class 8th, 9th aser 10th nung azünger kaketshir 37 denogo. Kaketshirtem ajungmesotsüba iba lecture sentong ayongzükba atema shilem agir kaketshirtemi Assam Rifles dang pelaba metetdaksü.

TEPELA LEMSATEPER



Aso : 08.01.1957 Asü: 28.02.2021

Onoki teti meima aliba **M. IMKONG LONGCHAR** (Waromung) taneptsü bushia mozükidang shirang yepten nung aliba mapang nungi asü pila mangyem anogo tashi temeimer kija kibong, arogo aser lokti shirnokisa sarasadem, nebu, shisatsü aser rongsen agi temeim nung mulongsoa ozü yariogo nenok ajak dang kangasa pelaba lemsateper.

Teyanglur tsüingremi nenok ajak moajangma.
Temeim kinüngtsü, jala, adianu, anükapang aser kinüngertem

OFFICE OF THE KHENSA VILLAGE COUNCIL

Mokokchung - 798601, Nagaland
TEPELA LEMSATEPER

Ozü Khensa lushi nung merokmi adoka 2nd and 3rd March 2021 anogo ananü tashi kanga meranga mi ajak remsepadaktsüogo. Iba mapang nung item telok aser kija ajanga yaritepa aruba tepela lemsateper.

1. Sangpangjang EAC Ongpangkong aser Dobashitem.
2. Fire and Emergency Service Mokokchung.
3. Yimyu ward yimten aser yimyu church youth Dept.
4. Khensa Watsü telen
5. Khensa Baptist Arogo aser Youth Dept.
6. Khensa Students Union.
7. Khensa Tokan Union.
8. Ajemer self help group Khensa.
9. Imtichuba Khensa.
10. Yimyu Ward Watsü.

Iba den shirnokisa yaritepogo nenok ajak dang kanga pelaba lemsateper.

Sd/-
Imtitoshi
Chairman
Khensa village council

Sd/-
Lanuchiba Ao
Secretary
Khensa village council

METETDAKTSÜR

Tang arua aliba Honibar 06th March, 2021 Mapang 8:00 am ako nungi Aoyimkum Senso General Public meeting alitsü. Iba anogo nung Sungpo nungi Puti tashi Aoyimkum Panchayat Hall nung arua atentsü metetdaksür.

GB.

G.B.
Aoyimkum Village
Dimapur : Nagaland
Regd No. 517/DC/DMP

President

President
Aoyimkum Lanur Telongjem

DRIVER KA BUSHIR

Dimapur nung Gari anishitsü atema DC-Court Area, Lengrijan aser Firing Range nung alir nübu ka bushir.

Itasen - 8,000/-

Tejangrartemi iba number ajanga tongtepratepang: 7005083159

NDPP pur shisadokten senden amen

Dimapur, Metsüremi/March 04, 2021 (TYO): asoshi party nung inyakertem ajungshiogo.

Brehostibarnü, Central NDPP indang Secretary Headquarters Chumukedima General, Abu Metha-ia Sorkar nung NDPP Central Office-i indang sentongtem metetdaksü tongtibang lokti tentet aser aser Party Manifesto indang committee den shisadokten tanga sentongtem senden ka ayonga agiogo, ta ajangzükttetsü atema tasa tasen sangdong ka ajanga metetdaksü. amshia maparen

Iba senden nung Dr. John inyaksangshitsü asoshi pai party Murry, Treasurer NDPP nung inyakertem ajungshia menden liasü. Chingwang liasü.

Iba senden nung senior party nunga party tashiita lenirtem, Tongtibang tentet ajak inyaksangshitsü atema nübur nungi President aser Committee den tesendaktep tajung ayutsü Convenor tem denogo, ta kasa aser longjemer inyaksangshitsü sangdong nung shia lir.

SPRING BADMINTON CHAMPIONSHIP

Organized by: Soyim Shuttlers (Under the aegis of MDBA)

Registration fee:
35+ & 45+ : 1000/-
Men's : 500/-

Prize Money : 1st Prize 2nd Prize
35+ & 45+ 12,000/- 8,000/-
Men's 10,000/- 6,000/-

Category :
1. Mens Double
2. 35+ (Double)
3. 45+ (Double)

Date : 15th to 17th March 2021

Venue : Bapu Tzubo (Amphitheatre) Ungma.



Skylark CC-i 29buba MDCA Inter Club Cricket Tournament kokogo



Mokokchung, Metsüremi/March 04, 2021: Imkongmeren Sports Complex, Mokokchung nung 29buba MDCA Inter Club Cricket Tournament final takok angur telok - Skylark asayatem den alakteta jaoker Moatoshi Tzudir (achiji nungi pezübuba) aser asayamung ayongertem külemi tangokba noksa ka yangi angur.

Mokokchung, Metsüremi/ March 04, 2021 (TYO): Brehostibarnü (04.03.2021) Imkongmeren Sports Complex, Mokokchung nung 29th MDCA Interclub Cricket Tournament 2021 final asaya nung Skylark CC-i wicket 8 agi A&K Cricket Fraternity kokogo.

Iba asayamung final asaya nung, Skylark CC-i over 16.3 nung A&K Cricket Fraternity puri run 121 target' yutsüba alizüing tongtet aser parnok asayang ana dang out süa liasü.

Toss koka, A&K Cricket Fraternity batting shim aser over 20 nung parnok asayar 7 out asü aser run 120 yanglutet. Fraternity rongnung asayar Nripen aser Meyameren nati run 29 aser run 26 yanglutet.

Skylark nungi bowler rongnung Temjenmeren-i wicket 2 out sütsü. Kasa team nungi Aloto, Vijay Rai aser Sanjay nungeri wicket ka ka agi.

Tanabuba innings nung, Skylark team-i kanga junga asaya tenzük, kong opener Vijay Rai aser Santosh na sentepa telok atema run 96 yanglutsü. Skylark atema Santosh-i run 57 not out' aser Vijay Rai-i run 44 bendenloksü.

Fraternity atema bowler rongnung Jangzapong-i wicket 2 agi. Skylark CC-i MDCA Trophy anabenbuba takok angur alitsü.

Iba final asaya mapang, nüngtugu contractor aser NDPP züingsem tajung Moatoshi Tzudir alakteta tejaoker ama aruagi denogo.

Iba asayamung ya Mokokchung District Cricket Association kübok Titans Club-i ayongzük.

29buba MDCA Inter Club Cricket Tournament nung asayatem award angubatem:

* Man of the Match First Semi: Santosh (Skylark CC) Spon. By Chyba, Kohima

* Man of the Match Second Semi: Nripen Rai (A&K Cricket Fraternity) Spon by. Merensola Nagaland Women Cricketer.

* Man of the Match Final: Vijay Rai (Skylark CC) Spon. By Meyisanger, President MDFA

* Most Promising Player: Sentiwapang (United Brothers) Spon. By Alingmen Kiphrie

* Best Batsman : Imliakum (Zungamedem CC) Spon. By Meyatsungba SDO Ralan

* Best Bowler: Aloto Chishi (Skylark CC) Spon. By IGNOU Mokokchung

* Best Wicketkeeper: Shamphri Terang (United Brothers) Spon. By Woshamo Yanthan Asst. Cmdr NSG

* Best Upcoming player (U-19) : Sanjay (Skylark CC) Spon. By Dr Funit, Secretary MDCA

* Spirit of the Game: Musketeers CC

* Man of the Series : Neehal Rai (A&K Cricket Fraternity) Spon. By Miss. Rongsennungla DPD ATMA Mokokchung.

Maneni, iba asayamung indang osang yamai alitsü:

* Total No. of Matches : 14 (with 1 match awarded Walk Over)

* Total run scored : 3522 runs

* Total Wickets fallen : 188 wickets

* No. of 6's : 74

* No. of 4's : 324

* 100's : 0

* 50's : 11

Swiss Open 2021: Srikanth o Sindhu na quarter-final-i iogo

Basel, Metsüremi/March 04, 2021 (Agencies):

Brehostibarnü Swiss Open Super 300 badminton tetoktepa nung PV Sindhu aser Kidambi Srikanth nati pei pei tata asaya koka quarterfinal-i iogo. Round tanabuba tebur kija asaya nung Ajay Jayaram-i 21-18, 17-21, 21-13 agi Denmark nunger seed tasembuba Rasmus Gemke kokogo.

Tebur kija asaya nung seed pezübuba Srikanth, shiba 2015 küm iba asayamung takok angu, pai 21-10 14-21 21-14 agi France nunger world no.50 Thomas Rouxel tsükdaksü. Taoba mapa World no.1 Srikanth-i last-eight nung seed trokbuba Thailand nunger Kantaphon Wangcharoen den asayatsü.

Sindhu-i America tsür Iris Wang madak 21-13, 21-14 agi takok angu. Tetsür kija quarter nung Sindhu-i Thailand tsür Busanan Ongbamrunphan den asayatsü. World No.7 Sindhu-i asaya 11-1 takok agi Busanan tejakdang lir aser January ita Toyota Thailand Open mezüing round nung lai Busanan koka lir.

Hokolbarnü, Jayaram-i Thailand nunger Kunlavut Vitidsarn den quarter final asayatsü. Kunlavut-i Sourabh

Verma madak 21-17, 21-14 agi kokogo.

Seed pezübuba Srikanth-i last eight nung seed trokbuba Kantaphon Wangcharoen den tokteptsü.

Bodhbar aonung tetsür kija asaya mezüing round nung, taoba asayamung anaben takok angula Saina Nehwal tsükogogo. London Olympic nung bronze-medal angula Sania-i 16-21 21-17 21-23 agi Thailand tsür Phittayaporn Chaiwan makok. Iba asaya minute 58 nung tembang.

Parupalli Kashyap-a Swiss Open Super 300 asayamung nungi tsükogogo; kasa mapang B Sai Praneeth Round of 16 tongogo.

Spain nunger Pablo Abian-i 15-21,10-21 agi Kashyap tsükdaksü. Kasa mapang Praneeth-i Isreal nunger Misha Zilberman madak 21-11,21-14 agi takok angu aser taruba round nung pai Abian den asayatsü.

Tetsür kija asaya Round of 16 nung seed tanabuba Sindhu-i America tsür Iris Wang den asayatsü.

Sourabh Verma-ia mezüing round nung Switzerland nunger Christian Kirchmayr madak 21-19 21-18 agi takok nguogo. Round of 16 nung pai Thailand

nunger seed 8buba Kunlavut Vitidsarn den asayatsü. Ano külen, Ajay Jayaram-i Thailand nunger Sitthikom Thammasin madak 21-12 21-13 agi takok ngua Round of 16 tongtetogo. Taruba round nung pai Denmark nunger seed tasembuba Rasmus Gemke kokogo.

Ajisiüaka, tebur kija mezüing round nung HS Prannoy-i 19-21 21-9 17-21 agi France nunger Mark Calijouw makok.

Tebur tarep mezüing round tetoktepa nung India nunger tebur tarep Satwiksairaj Rankireddy aser Chirag Shetty nati Scotland nunger Christopher Grimley aser Matthew Grimley madak 21-18 19-21 21-16 agi koka lir. Ano külen, Pranaav Jerry Chopra, shiba COVID-19 wara tenokdangba sülen iba asayamung nung mezüing shilem agia liasü, temeyoktep tarep nung pa den N Sikki Reddy külemi asaya, saka tenati 18-21 15-21 agi England nunger temeyoktep tarep seed tasembuba Marcus Ellis aser Lauren Smith na makok.

Swiss Open ya anogo atsülangtsür aliba Olympic qualification indang mezüing asayamung alitsü. Iba qualification June 15 nü tembangtsü.

PSL 2021: Pakistan Super League anogo atsülangtsür

Karachi, Metsüremi/March 04, 2021 (Agencies): Cricket atasar asem dak coronavirus tashidak tejangja putetba sülen, Brehostibarnü, tang asaya aliba Pakistan Super League (PSL) asayamung anogo atsülangtsüogo.

Asayar asem densema, PSL T20 asayamung nung shilem agir nisung tenet dak iba tesashi wara puteter alitsü. Tashidak puteta alir nisung tenet rongnung kano Staff züingsem alitsü.

"Team balala indang kibur tem den senden mena aser iba League nung shilem agir ajak kümzüka yutsütsü mera agitsü asadanger sülen, Pakistan Cricket Board-i tanü (Brehostibar) nungi tenzüka HBL Pakistan Super League 6 anogo atsülangtsü asoshi telemtetba agir," ta Pakistan Cricket Board (PCB) sangdong ka ajanga metetdaksü.

"February 20 nungitenzükba League nung nisung 7 dak coronavirus tashidak aliba tejangja putetba sülen, asayamung anogo atsülangtsü telemtetba agir," ta sangdong nung shia lir.

Domestic T20 tournament (PSL) nung team balala ana nungi nisung asem dak COVID-19 tashidak putetba ajanga asayamung anena

atatsüsa akümer aser parnok ajak anogo 10 tashi shinga den majurutepdaksü anepalutsü.

Bodhbarnü PSL asaya ana nung asayar asemprongla masayadaksü aser parnok dak iba tashidak temaitsü sayuba sülen, anüingdang Covid-19 atema tendang.

Asaya 34 tashi asayatsü renemba asayamung nung asaya 14 dang tembanga asayatet.

PCB-i ashiba agi, "asayamung nung shilem agir tsüingda iba tashidak prokba akok tashi azüoktsü atema parnok ajak PCR test agitsü, vaccine agütsütsü aser asayar trok ya takdang balala nung anepalutsü."

Asayamung nung shilem agir bendanger asayar aser local team nungi ketdangtsür kari tebilemba lemsatepba aser Australia nunger all-rounder, Dan Christian, pa talidaki aotsü lemtetba sülen, PCB-i iba League atsülangtsü asoshi bangjemtep.

Osang ajanga angazükba agi, bendanger asayar kari pei talidaki meyipa aotsü tebilemba lemsatep; kasa mapang taoba Pakistan cricket team captain-ia team hotel bio-secure bubble toktsür Karachi aotsü lemtet.

Argentina Open: Sumit Nagal quarter-i iogo

New Delhi, Metsüremi/ March 04, 2021 (Agencies): Bodhbarnü Buenos Aires kübok Argentina Open ATP 250 tebur kija Round of 16 asaya nung India nunger Sumit Nagal-i world no 22 Chile nunger Cristian Garin madak 6-4, 6-3 agi takok ngua quarter final-i iogo. Tan ATP tour nung Sumit-i quarter tongtetba ya mezüing alitsü.

Arishi küm 23 Sumit-i tan ATP asayamung nung takok ngua asaya quarter tongtetba ya pa atema takok rongnung tulutiba alitsü aser tasa balala amshia seed tanabuba Garin den toktepa asayaogo.

Tebur kija quarter final nung Nagal-i Spain nunger Albert Ramos-Vinolas den asayatsü terenemba lir. ATP Tour level nung India nunger rongnung Sumit mezüing quarter final tongteta asayar alitsü. Asaya tanga ka nung Ramos-Vinolas-i 7-5 6-4 agi Germany nunger Dominik Koepfer tsükdaksü.

Tawa tembanga Australian Open mezüing round nung Sumit Nagal 2-6, 5-7, 3-6 agi Lithuania nunger Ricardas Berankis makokba sülen iba asayamung nung nungi tsükadok. Melbourne nung mezüing Grand Slam

(Australian Open) tenzüksü aliba tejakdang Jhajjar nung soa intetsang Sumit ya Murray River Open nunga tamakok angu.

2020 küm tetenzüklen, US Open 2020 tebur kija asaya mezüing round nung India indang top-rank nung alir tebur kija asayar Sumit Nagal-i America nunger Bradley Klahn madak 6-1, 6-3, 3-6, 6-1 agi takok anguba mapang pai Grand Slam indang Round tanabuba mezüing tongtet.

2013 küm Somdev Devvarman-i Grand Slam main draw mezüing akokba sülen India tebur kija asayar rongnung Grand Slam main draw akoker rongnung Nagal mezüing aküm.

Kasa küm (2013) tongtibang asayamung asem nung Somdev-i tanabuba round tongtet.

Ajisiüaka, US Open 2020 asayamung nung Dominic Thiem-i pa tsükdaksüba sülen round tanabuba nung pa tukadok. Iba asayamung nung Dominic Thiem-i mezüing Grand Slam takok angu.

Final masayadang, Arthur Ashe Stadium nung Austria nunger world no. 3 Thiem-i 3-6, 3-6, 2-6 agi Nagal tsükdaksü.

BILEMDANGANG

"Pei kechi jembir aji mapa agi inyaktettsüla."